

Da historia e tragedia

Notg da film dil Forum cultural Tujetsch a Sedrun

(anr/hh) **Per la sisavla ga organisescha il Forum cultural Tujetsch uonn la notg da film. Mussadas vegnan treis producziuns, denter auter ina davart la construcziun dil conduct ault ella Val Mila avon prest 60 onns.** Las activitads dil forum sestendan sur plirs secturs dalla cultura. D'ina vart s'engaschan ils responsabels per il manteniment da beins culturals da muntada historica, da l'autra vart era en favur dalla litteratura. L'ediziun dallas ovras da pader Baseli Berther ein mo ina part da quei ch'ei vegniu prestau ils davon onns. Il forum ha denton era iniziav e procurav la finanziaziun dalla sanaziun dil casti da Putnengia a Dieni. Archivar documents, cudischs, fotografias e films ei ina ulteriura finamira dil forum. Aschia duei era vegnir reteniu quei che succeda ella vallada, per aschia saver documentar e mussar allas gneraziuns vegnentas la veta d'ozildi. El rom da quellas ponderaziuns organisescha il forum dapi tschun onns ina notg da film. Quella survescha alla presentaziun da documentaziuns da pli baul e promovav il medem mument la registraziun da films novs. Quest venderdis, ils 8 d'uost 2008 sespleiga la sisavla notg da film sin la piazza sper la Tges'alva a Sedrun. En cass da malaura ha igl arranschament liug en casa da scola a Sedrun.

Treis producziuns

L'emprema presentaziun allas 21.00 pertucca registraziuns fatgas ils onns 2007 e 2008 da Bruno Berther da Rueras. Aschia ha el filmav la conferenza da pressa davart la Porta Alpina, miez settember 2007, la prelecziun da Vic Hendry ed Arnold Spescha, l'undraziun da giuvens sportists entras la vischnaunca ed il til da tscheiver d'uonn. Medemamein ei igl autur staus duront in di tier la tiarza classa dils scalem superiur. Ord vesta dalla historia dalla vallada vala il film davart la construcziun dil conduct ault dalla Val Mila sco punct culminont dalla notg. Il film datescha digl onn 1949. El vegn commentaus quella sera da Robert Bohnenblust-Soliva ch'ei staus engaschav vid quellas lavurs e ch'ei oz sesents a Dieni. Da tutt'autra temprav ei il film «Ivo e Laura» che suonda sco tiarza e davosa part dalla notg da film. Quella producziun dalla Televisiun Rumantscha ei vegnida realisada igl onn 1991 cun scolars da Tujetsch. Reschissur ei Mic Feuerstein staus. Il film tracta d'in viadi da scolars a Cavorgia duront las vacanzas da stad. Nunspitgadamein arriva ina secunda gruppa a Cavorgia. Las duas gruppas ein da differenta tenuta e cumpartament. In tragic accident fiera in'umbriva sin quella sentupada.